

apud Cæsarem de Uscochis Sennia amovendis, licet Flaminus Delphinus vehementer urgeret, agebatur. Cæsareani Germanorum præsidio Senniam tueri se velle affirmabant; sed cum pecuniæ angustia obstaret, aliquam in id a Venetis argenti summam conferri subobscurè postulabant, aperte petere non audebant; neque id æquum Senatus arbitrabatur. Ab Rodulpho, ut procuratores ad fontes plectendos Senniam mitteret, ad Ferdinandum datæ literæ. Missi, nihil, quod ad pestem amovendam conducere, egere. Delphinus, nulla re impetrata, Praga excessit, Cæsareanis bellum turcicum obtendentibus; eo impediri, quo minus satis Reipublicæ facerent.

In eo spei exitus impares hoc anno fuere; nihil ad summam rei gestum, quo vel accessio imperii Cæsari fieret, vel ad pacem aditus utrimque exoptatam aperiretur. Buda frustra tentata, multis licet hostium cæsis, ac Bassa, qui urbe egressus fuerat, intercepto. Albam regalem pari fortuna Comes Suarcemburgius aggressus, urbe capta, hoste in arcem recepto, flammis absumpta, discessit. In Dacia magni tumultus ac mutationes sequutæ; nam cum Sigismundus Battoreus Andreae Battoreo Cardinali certis legibus eam provinciam concessisset, Mœsiæ Regulus, qui haud parva militum manu gravia Turcis damna intulerat, Andreae insensus, fines ingressus, prælio victor, Daciam occupaverat; post triduum ab inito certamine, Cardinalis capite ad eum delato, Claudiopoli potitus, gubernacula suscepit, easque ditiones auspiciis Cæsaris tenere se, ingentibus Turcarum spretis pollicitis, vulgaverat; qui hoc anno infelicitè Pappa, oppido in Pannonia, tentato, sæpius a Cæsareanis obtriti, in hyberna concessere; cum præsertim magnorum in Asia motuum initia suborirentur. Nam Cussainus, Ciliciæ Bassa, excusso Ottomanorum jugo, ingenti peditum atque equitum numero stipatus, Cilicia excursionibus deformata, Iconium præcipuam urbem ceperat. His intestinæ Principum dissensiones, corruptæque per luxum leges addebantur, ex quibus libidine atque effrenata licentia, prolapsa militari disciplina, in dies in provinciis Turcarum imperio subjectis non modo, verum Byzantii ingentes turbationes excitabantur, ut propemodum mole sua oppressa immensi imperii vis collabi videretur.

*Cæsareanorum ad Budam & Albam Regalem gesta.*

*In Dacia mutationes.*

*Andreas Battoreus Cardinalis a Valacco interfectus.*

*Cussainus Ciliciæ Bassa a Turcarum imperio defecit, Iconium occupavit.*